

小兒藥證直訣

閻氏方董氏斑疹方各一卷



光緒辛卯仲秋
池陽周氏校刊



小兒藥證真訣原序

醫之爲藝誠難矣而治小兒爲尤難自六歲以下黃帝不載其說始有顧願經以占壽夭死生之候則小兒之病雖黃帝猶難之其難一也脈法雖曰八至爲和平十至爲有病然小兒脈微難見醫爲持脈又多驚啼而不得其審其難二也脈旣難憑必資外證而其骨氣未成形聲未正悲啼喜笑變態不常其難三也問而知之醫之工也而小兒多未能言言亦未足取信其難四也臟腑柔弱易虛易實易寒易熱又所用多犀珠龍麝醫苟難辨何以已疾其難五也種種隱奧其難固多余嘗致思于此又目見庸醫妄施方藥而殺之者十常四五良



可哀也蓋小兒治法散在諸書又多出于近世臆說汗漫難據求其要妙豈易得哉太醫丞錢乙字仲陽汝上人其治小兒該括古今又多自得著名于時其法簡易精審如指諸掌先子治平中登第調須城尉識之余五六歲時病驚疳癖痕屢至危殆皆仲陽拯之良愈是時仲陽年尙少不肯輕傳其書余家所傳者纔十餘方耳大觀初余筮仕汝海而仲陽老矣于親舊間始得說證數十條後六年又得雜方蓋晚年所得益妙比于京師復見別本然旋著旋傳皆雜亂初無紀律互有得失因得參校焉其先後則次之重複則削之訛謬則正之俚語則易之上卷脈證治法中卷記嘗所治病下卷諸方

而書以全于是古今治小兒之法不可以加矣余念博
愛者仁者之用心幼幼者聖人之遺訓此惠可不廣耶
將傳之好事者使幼者免橫夭之苦老者無哭子之悲
此余之志也因以明仲陽之術于無窮焉宣教郎大梁

閻季忠序



四庫全書目錄提要

臣

等謹按小兒藥證真訣三卷宋大梁閻季忠所編錢乙方論也乙字仲陽東平人官至太醫院丞事跡具宋史方技傳乙在宣和間以巫方氏顱顙經治小兒甚著于時故季忠集其舊法以爲此書上卷論證中卷爲醫案下卷爲方陳振孫書錄解題馬端臨文獻通考並著錄明以來舊本久佚惟雜見諸家醫書中今從永樂大典內掇拾排纂得論證四十七條醫案二十三條方一百一十有四各以類編仍爲三卷又得閻季忠序一篇劉跂所作錢仲陽傳一篇並冠簡端條理秩然幾還其舊



疑當時全部收入故無大佚脫也小兒經方千古
罕見自乙始別爲專門而其書亦爲幼科之鼻祖
後人得其緒論往往有回生之功如六味丸方本
後漢張機金匱要略所載崔氏八味丸方乙以爲
小兒純陽無煩益火除去肉桂附子二味以爲幼
科補劑明薛己承用其方遂爲直補真陰之聖藥
其斟酌通變動契精微亦可以槩見矣閻季忠永
樂大典作閻孝忠然書錄解題及通考皆作季忠
疑永樂大典爲傳寫之訛今改從諸家作季劉跂
字斯立東平人摯之子也有學易集別著錄所撰
乙傳與朱史方技傳略同蓋朱史卽據此傳爲藍



本云乾隆四十五年十一月恭校上

總纂官內閣學士

臣

紀昀

陸錫熊

光祿寺卿

臣

陸錫熊

纂修官翰林院編修

臣

王嘉會

學海初讀

武英殿聚珍本小兒藥證真訣一書仰見

聖天子撫育至德被及萌芽豈第宣聖少懷之義而當

日諸臣蒐採之勤亦可謂能上體

皇仁而不遺餘力者矣急將付梓以廣其傳庶幾薄海

呱呱脫於天枉亦儒生窮居艸野宣布

德意上酬

小兒藥證真訣

是書



高厚之一端也旋復於書肆得所爲仿宋刻者其次第頗異而後附有閻孝忠小兒方董汲斑疹方各一卷夫當諸臣蒐採之日天下藏書之家莫不爭獻祕笈卒未得是書真本而今乃復見於世豈非古人精氣有不可磨滅者與是書原刻閻名作孝忠真訣作直訣今未敢易也 聚珍本往往有閻氏方論誤入錢書者今依宋本則各得其所矣其藥味分量閒有不同今各注于本方之末至薛氏醫案本已爲薛氏所亂不足引證云

光緒十七年辛卯長夏內閣中書周學海謹記



錢仲陽傳

河間劉跂撰

錢乙字仲陽上世錢塘人與吳越王有屬倣納土曾祖
贊隨以北因家於鄆父顥善針醫然嗜酒喜遊一旦匿
姓名東遊海上不復返乙時三歲母前亡父同產嫁醫
呂氏哀其孤收養爲子稍長讀書從呂君問醫呂將歿
乃告以家世乙號泣請往跡父凡五六返乃得所在父
積數歲乃迎以歸是時乙年三十餘鄉人驚歎感慨爲
泣下多賦詩詠其事後七年父以壽終喪葬如禮其事
呂君猶事父呂君歿無嗣爲之收葬行服嫁其孤女歲
時祭享皆與親等乙始以顥頤方著山東元豐中長公
主女有疾召使視之有功奏授翰林醫學賜緋明年呈



子儀國公病瘵癰國醫未能治長公主朝因言錢乙起
草野有異能立召入進黃土湯而愈神宗皇帝召見褒
諭且問黃土所以愈疾狀乙對曰以土勝水木得其平
則風自止且諸醫所治垂愈小臣適當其愈天子悅其
對擢太醫丞賜紫衣金魚自是戚里貴室逮士庶之家
願致之無虛日其論醫諸老宿莫能持難俄以病免哲
宗皇帝復召宿直禁中久之復辭疾賜告遂不復起乙
本有羸疾性簡易嗜酒疾屢攻自以意治之輒愈最後
得疾憊甚乃歎曰此所謂周痺也周痺入藏者死吾其
已夫已而曰吾能移之使病在末因自製藥日夜飲之
人莫見其方居亡何左手足攣不能用乃喜曰可矣又



使所親登東山視菟絲所生秉火燭其下火滅處斲之
果得茯苓其大如斗因以法噉之閱月而盡絲此雖偏
廢而氣骨堅悍如無疾者退居里舍杜門不冠屨坐臥
一榻上時時閱史書雜說客至酌酒劇談意欲之適則
使二僕夫輿之出沒閭巷人或邀致之不肯往也病者
日造門或扶攜襁負纍纍滿前近自鄰井遠或百數十
里皆授之藥致謝而去初長公主女病泄利將殆乙方
醉曰當發疹而愈駙馬都尉以爲不然怒責之不對而
退明日疹果出尉喜以詩謝之廣親宗室子病診之曰
此可無藥而愈顧其幼曰此兒旦夕暴病驚人後三日
過午無恙其家恚曰幼何疾醫貪利動人乃如此明日



果發癰甚急復召乙治之三日愈問何以無疾而知曰
火急直視心與肝俱受邪過午者心與肝所用時當更
也宗室王子病嘔泄醫以藥溫之加喘乙曰病本中熱
脾且傷奈何以剛劑燥之將不得前後洩與石膏湯王
與醫皆不信謝罷乙曰毋庸復召我後二日果來召適
有故不時往王疑且怒使人十數輩趣之至曰固石膏
湯證也竟如言而效有士人病欬面青而光其氣哽哽
乙曰肝乘肺此逆候若秋得之可治今春不可治其家
祈哀彊之與藥明日曰吾藥再瀉肝而不少卻三補肺
而益虛又加唇白法當三日死然安穀者過期不安穀
者不及期今尙能粥居五日而絕有妊婦得疾醫言胎



且墮乙曰娠者五藏傳養率六旬乃更誠能候其月偏補之何必墮已而子母皆得全又乳婦因大恐而病病雖愈目張不得瞑人不能曉以問乙乙曰煮郁李酒飲之使醉則愈所以然者目系內連肝膽恐則氣結膽衡不下惟郁李去結隨酒入膽結去膽下目則能瞑矣如言而效一日過所善翁聞兒唬愕曰何等兒聲翁曰吾家學生二男子乙曰謹視之過百日乃可保翁不憚居月餘皆斃乙爲方博達不名一師所治種種皆通非但小兒醫也於書無不闚他人靳靳守古獨度越縱舍卒與法合尤邃本艸多識物理辨正闕誤人或得異藥或持疑事問之必爲言出生本末物色名貌退而考之皆



中末年攣痺浸劇其嗜酒喜寒食皆不肯禁自診知不可爲召親戚訣別易衣待盡享年八十二終於家所著書有傷寒論指微五卷嬰孺論百篇一子早世二孫今見爲醫

劉跂曰乙非獨其醫可稱也其篤行似儒其奇節似俠術盛行而身隱約又類夫有道者數謂余言曩學六元五運夜宿東平王冢巔觀氣象至逾月不寐今老且死事誠有不在書者肯以三十日暇從我當相授余笑謝弗能是後遂不復言嗚呼斯人也如欲復得之難哉沒後余聞其所治驗尤眾東州人人能言之剟其章章者著之篇異時史家序方術之士其將有考焉



小兒藥證直訣目錄

卷上

脈證治法

小兒脈法

變蒸

五藏所主

五藏病

肝外感生風

肝熱

肺熱

肺盛復有風冷

肺虛熱

肺藏怯

心熱

心實

腎虛

面上證

目內證

肝病勝肺

肺病勝肝

肝有風

肝有熱

肝有風甚

驚癇發搐

早晨發搐

日午發搐



日晚發搐 夜間發搐 傷風後發搐

傷食後發搐 百日內發搐

急驚 慢驚 五癇

瘡疹候 傷風 傷風手足冷

傷風自利 傷風腹脹 傷風兼藏

傷風下後餘熱 傷寒瘡疹同異

初生三日內吐瀉壯熱

初生三日已上吐瀉身溫涼

初生下吐 傷風吐瀉身溫

傷風吐瀉身熱 傷風吐瀉身涼

風溫等熱相似 腎怯失音相似

